

Date – 12/04/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. AMC inthlan tur atana ni 9 chiah la awmah political party-te ngawrh takin an campaign mek.
2. Lok Sabha MP Pu Richard Vanlalhmangaiha'n MP Local Area Development Scheme chu mipui sum anih angin khawtlang tana huam zau thei ang bera hman a tum thu a sawi.
3. Central YMA President Pu R Lalnggheta'n Ruihhlo ngaite chhanchhuah chu hna hautak ni mahse beidawng lova mahni mawhphurhna theuha ngaih a tul thu a sawi.
4. Sorkar laipui chuan ram chhunga LPG cylinder delivery chu a pangngaia a kal reng thu a sawi.



AMC ELECTION

Aizawl Municipal Corporation (AMC) inthlan atana vote thlak ni tura ruat April ni 21, 2026 atanga chhiar letin ni 9 ala awm a, AMC inthlan tur atan hian political party-te ngawrh takin an campaign mek a ni.

Puan tawh angin AMC Inthlan neih turah hian political party pathum - Indian National Congress (INC) Mizo National Front (MNF) leh Zoram Peoples Movement (ZPM) ten ward tin chuh turin candidate 19 theuh an nei a, Bharatiya Janata Party (BJP) pawhin ward 11 chuh turin candidate an nei bawk.

Vote thlak ni tur atan April ni 21, 2026 ruat a ni a, zing dar 7 atanga tlai dar 5 thleng vote thlak hun hawn a ni ang. Inthlan result hi April ni 27 zing dar 8 atangin chhiar tur a ni.

AMC inthlan hi tum 3 neih a ni tawh a, inthlan hmasa ber kha November ni 3, 2010-ah neih niin MNF party-in seat 6, ZNP leh INC-in seat 5 ve ve leh MPC-in seat 3 an la a; inthlan vawi 2-na hi November ni 26, 2015-ah neih niin MNF-in seat 11, INC-in seat 7 leh MPC-in seat 1 an la a ni.

Inthlan hnuhung ber February ni 16, 2021-ah khan a tirah MNF-in seat 11 an laa, ZPM-in seat 6 leh INC-in seat 2 an la. Vanduaithlak takin Ward No.6 corporator Pu John Zosangliana Ralte (MNF) chu a boral avangin by-election neih a ni a, hetah hian ZPM candidate Pu H Lalremtuanga thlan tlin niin, term tawp thlengin MNF-in seat 10, ZPM-in seat 7 leh INC-in seat 2 an nei ta a ni.



PWD Minister Inspects Road Construction at Champhai

PWD Minister Pu Vanlalhlana chuan Mizoram khaw hrang hranga kawngpui siamthat tur a enfiahna kal zelah nimin khan Champhai, Mualkawi, Melbuk leh Zokhawthar inkalpawhna kawng siamthat tur a hmunah kalin a enfiah.

Minister hi PWD Department hotu Engineer-in-Chief, Chief Engineer-te leh Technical Officer-ten an tawiawm a. Highway kawnghluiin a paltlang siam thatna tur One Time Improvement (OTI) atan hian cheng Nuai 985 sanction a ni a. He hna hian Champhai khawchhung Kanan Veng atanga New Champhai Zotlang inkar bakah Mualkawi, Melbuk, leh Zokhawthar khawchhung kawngte a huam dawn a ni. He kawng, a tira Km 17.45-a thui hi Black top chhah tha tak (BC=40mm) hmanga siam tur a ni a, tunah hian Tender buaipui mek a ni.

Hemi bakah hian, Khankawn atanga Zokhawthar inkar, 2-lane highway awmsa enkawl zui (Performance Based Maintenance Contract - PBMC) hna thawhna tur hian cheng Nuai 2,895 sanction a ni bawk. He hna atan hian Tender chhuah tawh niin, tun thla ni 30 hian Technical Bid hawn a ni ang a. He hnathawh tur hian kawng chhe lai hnawh phui (Initial rectification), Road sign leh Protection wall siam, leh kawng tuana Blacktop thar (Periodic Maintenance) te a huam a ni.

He hmalakna hnuai hian kawng siam bakah kum 5 chhung enkawl zui (Routine Maintenance) hna leh leimin thenfai (Emergency works) hnate pawh a tel vek dawn a. He hmalakna hian Champhai leh Zokhawthar inkar inkalpawhna a ti hmasawn hle tura beisei a ni.



KHAWZAWL DISTRICT WRESTLING ASSOCIATION

Nimin khan Khawzawl Zaingen YMA Hall-ah Khawzawl District Wrestling hawn a ni.

Khawzawl Sub Deputy Commissioner Pu R. Lalrinhlua chuan Khawzawlin Wrestling Association a nei chu lawmawm a tih thu sawiin infiamna chawisan zel anih theihna tura hmanraw pawimawh tak anih a beisei thu a sawi a, infiamna chuan rilru hrisel a ken tel avangin mihring hriselna atan a pawimawh avangin infiamna uar deuh deuh turin kalkhawmte a sawm a ni.

Khawzawl District chhungah Sports Association hrang hrang 17 vel a awm a. Annual Program duante hmangin chhawmdawlina dawn thin ani, a ti bawk.

<><><>

LS MP

Lok Sabha MP Pu Richard Vanlalmangaiha'n MP Local Area Development Scheme chu mipui sum anih angin khawtlang tana huam zau thei ang bera hman a tum thu a sawi.

Pu Richard Vanlalmangaih hian nimin khan Republic Veng leh Upper Republic Veng YMA hnenah Mahindra Bolero Pick-Up pakhat ve ve a pe a, MP Local Area Development Scheme atanga inpek anih thu sawiin scheme chu mipui tana tangkai taka hman tur a nih avangin khawtlang tan a huam zau thei ang bera hman a duh thu a sawi.

Aizawl South I bialtu MLA Pu C Lalsawivunga chuan motor an dawn chu khawtlang mipui ten tangkai taka an hman ngei a beisei thu sawi a, damlo ruang phurhna chauh nilo veng tana thil tangkai hrang hrangah hmang turin a chah a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MNF PRESS CONFERENCE

MNF AMC Candidate Pi R Lalnunthari'n Aizawl khawpui khawsak phung chu dinhmun sang zawka hlankai tumin MNF Party an inruahman tih a sawi.

He thu hi nimina Aizawl Press Club-a thuthar thehdarhtute an kawmnaah sawiin Pi R. Lalnunthari chuan Aizawl khawpui nuam leh changkang zawk siam zel an tum thu a sawi a, Aizawl khawpui chu hawisan an tumlo tih sawiin dinhmun sang zawka hlankai an tum thu a sawi.

Pi R Lalnunthari chuan AMC Inrelbawlna tha zawk leh chak zawk siam tum a ni tiin AMC hnuuia Deve-lopment hnathawh reng reng kut tling leh mawi, belhchian dawl a nih zel theih nan hmalak chhonzawm a ni dawn a ti a, AMC sorkar chak zawk leh langtlang din chhonzawm tum a nih thu sawiin AMC huam chhungah khualzin leh pem lut an pun zel avangin Aizawl khawpuia cheng dik takte chhinchhiahna (Population Registration) uluk zawka kalpuin - nau piang, mitthi leh pem lutte chhinchhiah an tum a ti a, Aizawl khawpui veng hrang hrangte leimin leh lei tlahniam laka a him zawk nan tuihawk luankawr tha zawk leh a khuhna siam belh an tum tih sawiin heng ti hlawhtling tur hian MNF Candidate te thlang tling turin mipuite a sawm a ni.

MNF Candidate chuan Aizawl khawpui veng thenkhat lirthei luh theih lohnaah bawlhhlawh paih dan mumal zawk ruahman a ni dawn a ti a, Ran vulh leh ran khuahkhirh chungchangah Local Council-te be rawnin mipui zawh tawka hmalak chhonzawm zel a ni dawn tih a sawi a.

Pi R Lalnunthari chuan Social Media-ah mimala beihna a tawk nasa tih sawiin amah hawtute leh amah beitate chu Pathian hmingin a ngaidam vek a ti a, Ward 4 a hmangaih em avangin tling ngei turin theihtawp a chhuah thu a sawi baw.



OIL & GAS

Mizoram Sorkar chuan, indona thleng mek vanga eirawngbawlna Gas leh tuialhthei-a harsatna thleng thei lakah Mizoram Sorkar chuan ngawrh takin hma a la reng a. Tun dinhmunah eirawngbawlna Gas leh tuialhthei chu Mizoramah a thleng tha a, mipui tan chia-na tur a awm lo tih an sawi.

Sawrkhar tarlan danin nimin April ni 10 thleng khan Mizorama LPG Distributor hrang hrangah Domestic (14.2Kg) bur 13924 a awm a, kawng laka thang mek bur 25465 nen a vaiin bur 39389 awm ang a ni a. Commercial (19Kg) chu Distributor-ten bur 613 an kawl bakah kawng laka thang mek nen avaiin bur 1021 a awm a. Petrol pawl Filling Station-ah Kilolitre 1251.10 awmin, kawng laka thang mek Kilolitre 484 nen a vaiin Kilolitre 1735.10 awm ang a ni a. Diesel chu Filling Station-a Kilolitre 1508.80 awmsa bakah kawng laka thang mek Kilolitre 596 nen a vaiin Kilolitre 2104.80 awm ang a ni.



CYMA PRESIDENT

Central YMA President Pu R Lalngheta'n Ruihhlo ngaite chhanchhuah chu hna hautak ni mahse beidawng lova mahni mawhphurhna theuha ngaih a tul thu a sawi.

He thu hi Seling YMA Run-a Zawlbuk Group YMA Inkhawmpui vawi 45-na a palai te thlahna leh YMA Kumpuan, 'Ruihhlo Do' hawna hun a hmanpuina ah sawiin CYMA President chuan ruihhlo avanga Mizo thalaite thlanmuala an liam zel avangin ruihhlo do turin theihtawp chhuah a ngaih thu a sawi a, Ruihhlo laka hnam chhanchhuah a tul thu a sawi.

<><><>

LPG

Sorkar laipui chuan ram chhunga LPG cylinder delivery chu a pangngaia a kal reng thu a sawi.

Nimin khan cylinder nuai 51 sing 5 chuang deliver a ni a. Thuchhuah siamin Petroleum and Natural Gas Ministry chuan ram pumah LPG khawlkhawm leh dan loa hralh tihtawp nan hmalak chhunzawm zel a nih thu an sawi a. Nimin khan ram pumah vawi 3,400 dapchhuah hna neih a ni.

A awmsa leh LNG bungrua lo thleng tur ruahman dan a zirin, fertilizer plant-a gas pek chhuah zawng zawng chu zaa 5-a tihpun belh a ni a, thla ruk chhunga an hman zat atanga zaa 95 vel a tling thei dawn a ni. March thla atang khan PNG connection nuai 4.15 vel chu gas hman tir an ni tawh a, connection thar atan hian customer nuai 4 sing 5 sang 5 velin an inziah luh belh tawh bawk. Tun thleng hian PNG hmang sing hnih sang ruk chuangin MYPNGD.in website kaltlangin an LPG connection an pe let tawh a ni. Hetihlai hian Ministry of Ports, Shipping and Waterways chuan West Asia biala India lawng leh tuipui lama thawkte venhimna atan a tul angin hma an la a . He biala India tuipui lama thawk zawng zawngte hi an him vek a, darkar 24 kalta chung khan India flag vuah lawng kalah buaina thleng a awm lo. India flag tar LPG lawng Jag Vikram chuan nimin khan Strait of Hormuz chu him takin a pel a ni.

<><><>